





## **Акафист**

### **святому Апостолу Варфоломею**

#### **Кондак 1**

---

Избранному от людей израилевых во Христова Апостола на уловление человеков, чудному Варфоломею, пения похвальная принесем, вернии, яко оставльшему дом свой, нищету Христову возлюбившему и Христово учение паче учения еврейских книжников избравшему. Ты же, святой Апостоле, всех нас, память твою честную празднующих, не остави своим предстательством и заступлением, да благодарными устами вопием ти: Радуйся, святой славный и всехвальный Апостоле Варфоломее.

#### **Икос 1**

---

Ангелов Господь и Спаситель всего рода человека, провидев чистоту души твоея, святой Варфоломее, благоволи избрати тя во единого от обоюнадесяте и нареци Апостолом Своим. Мы же, дивящися духовным дарованиям твоим, прославляем тя сице:

Радуйся, Варфоломее, великий Христов Апостоле.

Радуйся, учениче Христов усерднейший.

Радуйся, яко сердце свое непорочно имел еси.

Радуйся, яко лукавья наставления старцев еврейских отвергнул еси.

Радуйся, яко всем сердцем своим Христу прилепился еси.

Радуйся, яко вся мирския блага ни во чтоже вменил еси.

Радуйся, яко отца и мать, братию и сестры своя ради Господа оставил еси.

Радуйся, яко во следовании за Христом истинное блаженство восприял еси.

Радуйся, учением Христовым пленивыйся.

Радуйся, в пути Христовом благо Царствия Небеснаго предвкусивый.

Радуйся, благогласнейший проповедниче Христова учения.

Радуйся, верный слуго Господь.

Радуйся, святой славный и всехвальный Апостоле Варфоломее.

## Кондак 2

---

Видя чудная дела Господа своего и Учителя и слыша из уст Его исходящее небесное учение, ясно уразумел еси, святой Варфоломее, со Апостолом Петром и прочими Апостолами вкупе, яко глаголы живота вечнаго Учитель ваш имать, и яко Он есть воистину Сын Бога Живаго, Емуже вся земля едиными усты взывати научается: Аллилуиа.

## Икос 2

---

Разумному Солнцу Правды вседушевно восхотел еси, святой Апостоле Варфоломее, поработати и радостно приял еси заповедь Господа о проповеди овцам погибшим дому Израилева; сего ради потщался еси со всеми Апостолами по весям и градом Израилевым ходяще, болящия исцеляти, прокаженные очищати, мертвые воскрешати, бесы изгоняти и всем проповедати и вещати, яко приблизися Царствие Небесное. Воспоминающе апостольския труды твоя, сия похвальная восписуем ти:

Радуйся, усердный заповедей Христовых исполнителю.

Радуйся, всего себе Господеви послушно поработивый.

Радуйся, яко не стяжал еси ни злата, ни сребра, ни меди при поясе своем.

Радуйся, яко ни пиры в путь, ни двою ризу, ни жезла с собою, по заповеди Христа, не брал еси.

Радуйся, яко мир Христов в дома вносил еси.

Радуйся, яко с добрыми добре пребывал еси.

Радуйся, яко от неприязших мира Христова паки себе мир принимал еси.

Радуйся, яко учение Господа своего усердно проповедал еси.

Радуйся, ты бо, по слову Христову, яко овча посреде волков с Евангелием шествовал еси.

Радуйся, яко болезни неисцельныя целил еси.

Радуйся, яко духов лукавых изгонял еси.

Радуйся, яко прокаженныя очищал еси и мертвыя воскрешал еси.

Радуйся, святой славный и всехвальный Апостоле Варфоломее.

### Кондак 3

---

Сила духовная Божественнаго учения  
всесовершенно плени тя, славный Варфоломее,  
сего ради никояже сладости мира сего восхотел  
еси вкушати, токмо единого истиннаго блага  
желал еси присно наслаждаться, во еже слушати  
слова Учителя своего, созерцати сладкий лик  
Господа своего, зрети дивное служение Его  
скорбящим и обремененным и во веки со всеми  
избранными Его взывати Ему ангельскую песнь:  
Аллилуиа.

### Икос 3

---

Имея богатство неизреченныя благодати, Спас  
мира и Господь, ведый, яко прииде Ему час, да  
прейдет от мира сего ко Отцу, тайноводствова  
Своя, сущия в мире, ученики, показуя им  
прежде Креста Своего путь добрейший  
смирения, начат умывати нозе другом Своим и  
отирати лентием; таже хлеб и вино благослови  
Господь и Таинство Причащения в Церкви  
Своей на веки утверди. Сия видево святой  
Варфоломей с прочими Апостолы, всем сердцем  
своим вождеде Учителю своему подражати и, в  
Его воспоминание, Святое Таинство  
Причащения присно совершати. За таковое

твоего сердца благое изволение ублажаем тя, святой Апостоле, восхвалениями сими:

Радуйся, добрый и послушный Христов учениче.

Радуйся, благоговейный исполнителю Христовых заповедей.

Радуйся, яко сподобился еси прияти омовение ног своих от Господа твоего и Учителя.

Радуйся, яко на Тайной Вечери Тела и Крови Христовых приобщился еси.

Радуйся, Христову тайноводству научивыйся.

Радуйся, заповедь новую от Господа приявый, во еже душу свою положить за други своя.

Радуйся, смирения Христова истинный служителю.

Радуйся, словом Христовым очищенный.

Радуйся, за Господа и Христа жизнь свою положить обещавай.

Радуйся, любви Христовы проповедниче.

Радуйся, о всем мире теплый к Богу молитвенниче.

Радуйся, всех скорбящих и обремененных заступниче.

Радуйся, святой славный и всехвальный Апостоле Варфоломее.

#### **Кондак 4**

---

Буря велиих смущений найде на тя, святой Апостоле, егда видел еси Господа своего и Учителя от предателя лестию лобзаннаго, в руке лютых и беззаконных судей преданнаго и на смерть позорную осужденнаго; егда же услышал еси святых жен мироносиц, радостную весть о Воскресении принесших, и егда своима очима сподобился еси зрети воскресшаго Господа, язвы Своя на пречистем теле Своем показующаго, тогда со всеми Апостолы, печаль свою на радость преложив, воззвал еси велегласно Господу Христу, из мертвых воскресшему: Аллилуиа.

#### **Икос 4**

---

Слышал еси, славный Варфоломее, Божественныя глаголы Господа, по воскресении Своем отверзшаго Апостолом ум разумети Писания, яко тако подобаше пострадати Христу и воскреснути из мертвых в третий день; видел

еси Господа своего с горы Елеонския во славе вознесшагося и с радостию велиею возвратился еси во Иерусалим, хваля и благословя Бога. За такое твое радостное прославление Господа, паки во славе грядущаго судити живым и мертвым, воспеваем ти, святыи Апостоле, похвалы сицевыя:

Радуйся, воскресшаго Господа видети сподобивыйся.

Радуйся, гвоздиным язвам на пречистем теле Его усердно поклонивыйся.

Радуйся, яко во Христовом воскресении уверился еси.

Радуйся, яко явлением Его все сладким мудрости и разума исполнился еси.

Радуйся, со Христом, по воскресении Его, общия трапезы насладивыйся.

Радуйся, от Него Писания пророческая разумети научивыйся.

Радуйся, на горе Елеонстей, яко в преддверии небеснем, со Учителем своим обретыйся.

Радуйся, благословение Господне получитьи сподобивыйся.

Радуйся, Божественного вознесения свидетелю.

Радуйся, светлых небожителей собеседниче.

Радуйся, великия благодатныя радости в день вознесения причастниче.

Радуйся, хвалы и прославления Господа светлый источниче.

Радуйся, святой славный и всехвальный Апостоле Варфоломее.

### **Кондак 5**

Богоглаголивый Лука явственно всей вселенней повествует, яко собранным во Иерусалиме всем учеником Христовым, внезапно бысть шум с небесе, яко носиму дыханию бурну, и исполни весь дом, идеже ученицы Его бяху сидяще, и явишася им разделени языцы, яко огненнии, седе же на едином коемждо их, и исполнишася вси Духа Свята, и начаша глаголати иными языки, якоже Дух даяше им провещавати. С прочими святыми Апостолы Христовыми в Сионстей горнице и ты был еси, блаженне Варфоломее, и дара языка сподобился еси получитьи, и с велиею радостию и крепким дерзновением, Духом Святым водимый,

научился еси иными языки в Троице славимому Богу непрестанно взывати: Аллилуиа.

## Икос 5

Увидел еси, святыи Апостоле Варфоломее, в павшем ти жребии проповедати Христово Евангелие в Сирии, Асии и прочих соседних странах со Апостолом Филиппом вкупе, повеление Самаго Господа. Сего ради тягостных путей апостольских не убоялся еси, страданий за Господа Христа не утратился еси и, купно с Филиппом, единаго Господа в сих странах проповедал еси; тогда и Лидийския и Мизийския грады и веси оглашени быша проповедию апостольскою. Дивящися сим благовестническим трудом твоим, сиче радостно тебе глаголем:

Радуйся, неленостный исполнителю заветов Христовых.

Радуйся, безбоязненный проповедниче Христова Евангелия.

Радуйся, яко со Апостолом Филиппом и сестрою его Мариамною по градам и весям Асийским и Лидийским с благовестием шествовал еси.

Радуйся, яко со Апостолом Иоанном Богословом благодатными утешении наслаждался еси.

Радуйся, неустанный к Богу молитвенниче.

Радуйся, дара любви к Богу и людям усердный приумножителю.

Радуйся, покаяния учителю.

Радуйся, смирения наставниче.

Радуйся, идолов сокрушителю.

Радуйся, великих Таин Божиих провозвестниче.

Радуйся, огненными словесы своими слух языческих людей огласивый.

Радуйся, ко Христу детоводителю их прилежный.

Радуйся, святой славный и всехвальный Апостоле Варфоломее.

### **Кондак 6**

---

Проповедницы учения Христова усерднейшии явишася святии Варфоломей, Филипп и блаженная Мариамна, егда со Христовым Евангелием внидоша во град фригийский Иераполь, иже бе исполнен мерзких

идолов, ослепленнии же людие его боготвориша змии и ехидны. Первее святии Апостоли, со Иоанном Богословом вкупе, велию ехидну молитвою своею победиша и копием умертвиша; послежде же день и ноць ко славе Божией труждающеся, научиша многия воспевати купно с ними песнь хвалебную Господеви: Аллилуиа.

### **Икос 6**

Возсия обильно свет учения Христова во граде Иераполе, егда святыи Варфололей, с Филиппом и Мариамною вкупе, отверзоша очи некоему Стахию, четьредесят лет слепотствующему, жену Анфипата Иерапольскаго, змием угрызенную, от одра смертнаго воздвигоша, еше же и многи недужныя исцелиша и бесныя уврачеваша. Анфипат же злый, ярости исполнися, егда услыша, яко жена его веру Христову прият, повеле святых Апостолов лютым мукам предати. Мы же, воспоминаия сия славныя страдания и подвиги во славу Христа, восхваляем святаго Апостола Варфоломея всеусердно:

Радуйся, Духа Святаго сосуде вседрагий.

Радуйся, велиих чудес совершителю.

Радуйся, слепым зрение даровавый.

Радуйся, хромым благосшествие устройвый.

Радуйся, от укушения ядовитых змий  
целителю.

Радуйся, бесов прогонителю.

Радуйся, неустрашимый исповедниче  
всесладкаго имене Христова.

Радуйся, купно с Филиппом на смерть  
осужденный.

Радуйся, на стене идольскаго капища  
распятый.

Радуйся, силою Божиею невредим  
сохранившийся.

Радуйся, чудесы своими многи ко Христу  
обративый.

Радуйся, Стахия во епископа Иерапольскаго  
поставивый.

Радуйся, святой славный и всехвальный  
Апостоле Варфоломее.

### **Кондак 7**

Хотя вси концы вселенныя учением  
Христовым огласити, святой Варфоломей, от

лютых гонений Анфипата Иерапольскаго избавленный, с проповедию Христовою, Духа Святаго повелением, прииде во Индийския страны, идеже во славу Христову нимало времени потрудися, шествуя из града во град, из веси в весь, благосвещуя мир Христов, исцеляя болезни неисцельныя и научая люди стран Индийских оставить идолы безстудныя, единому же Богу, благодееющему всем, взывати: Аллилуиа.

### **Икос 7**

Дивное благопопечение о людех стран Индийских явил еси, святыи Апостоле, егда насельники стран сих просветив и Церковь тамо устроив, Евангелие от святаго Матфея, с собою носимое, на язык их преложи, и самое то Евангелие, от Матфея написанное, у нихже остави. Сего ради просвещеннии тобою людие стран Индийских благодарно воспеваху ти, святыи Варфоломее, тако:

Радуйся, великий наш Апостоле.

Радуйся, во Христе отец наш чадолюбивый.

Радуйся, муками рождения о нас болезновавый.

Радуйся, Христа Господа в нас вообразивый.

Радуйся, идольскую лесть обличивый.

Радуйся, ко истинному свету вся ны наставивый.

Радуйся, слова Евангелия Христова нам оставивый.

Радуйся, Церкви Божия устроителю.

Радуйся, неустанный о нас пред Престолом Божиим предстоятелю.

Радуйся, о всем мире теплый пред Богом ходатаю.

Радуйся, крепкое наше упование.

Радуйся, о нашем спасении изрядный попечителю.

Радуйся, святой славный и всехвальный Апостоле Варфоломее.

### **Кондак 8**

---

Странно есть неверующим слышати, како святой Апостол Варфоломей, светом истины Христовы осиявый страны Индийския, паки новую ниву, Христовым учением невозделанную, обрете, и на конец жития своего в Великую Армению устремися, да просветит и

зде люди, во тьме и сени смертней сидящая, и да научит их единому Творцу и Господу благодарными усты воспевати: Аллилуиа.

### **Икос 8**

---

Весь духом горя о славе Господней, прииде святыи Апостол Варфоломей в Великую Армению и усердно возва в молитве своей ко Господу, да посрамлени будут беси, во идолах страны тоя обитавшия, и да будут ниспровергнуты бездушнии идоли; и не тща бе молитва святаго Апостола: беси умолкоша, идоли падоша, людие же сего бесовскаго мучительства и безумия избавльшеся, восхваляху святаго просветителя своего сицевыми радостными воззвании:

Радуйся, Апостоле, красными ногами своими землю нашу освятивый.

Радуйся, святую истинную веру всем нам возвестивый.

Радуйся, бесов изгонителю.

Радуйся, идолов сокрушителю.

Радуйся, в молитве и дерзновении пламенеющий.

Радуйся, во святем служении Господу добрый пример нам показующий.

Радуйся, дивный Христов благовестниче.

Радуйся, преславный чудотворче.

Радуйся, болезни наша врачующий.

Радуйся, скорби наша разгоняющий.

Радуйся, всех нас истинно возлюбивый.

Радуйся, всем нам путь ко спасению показавый.

Радуйся, святой славный и всехвальный Апостоле Варфоломее.

### **Кондак 9**

---

Вси людие Великия Армении зело удивляхуся, зряще чудеса и знамения тобою, святой Апостоле, совершаемая; егда же видеша идолы падшия, духи нечистыя изгонимыя, славляху Бога, дивнаго во святых Своих, и воспеваху Ему благодарными усты: Аллилуиа.

### **Икос 9**

---

Витийствующий язык человеческий не возможет достойно восхвалити болезни и труды твоя, знамения и чудеса, святой Апостоле, в

Велицей Армении бывшая; сила же знамений сих даже до царева дому достиже, егда из дщере царевой молитвою твоею бес изгнася. Егда же царь и вси людие твою во Христе нелицемерную нищету узревше, обратишася ко Христу, тогда вся Великая Армения от царева дому и до обиталища бедных огласися сицевыми радостными и хвалебными пении тебе, великому Апостолу и чудотворцу:

Радуйся, чудотворче предивный.

Радуйся, всех болящих врачу безмездный.

Радуйся, славу Христову паче земных сокровищ возлюбивый.

Радуйся, о спасении душ человеческих прилежавый.

Радуйся, царя Полимия, царицу и дщерь их ко Христу обративый.

Радуйся, и царедворцы знатныя, и от простых людей нимало святым Крещением просветивый.

Радуйся, нищету духовную и телесную возлюбивый.

Радуйся, славный безсребрениче.

Радуйся, Великия Армении просветителю.

Радуйся, отче наш чадолюбивый.

Радуйся, райския двери нам отверзающий.

Радуйся, от пути погибельнаго нас  
исхищающий.

Радуйся, святыи славный и всехвальныи  
Апостоле Варфоломее.

### **Кондак 10**

---

Спасению новых и новых людей работая,  
достига еси, святыи Апостоле Варфоломее,  
блаженнаго конца жития своего: жрецы бо  
идольстии в Велицей Армении видяще, яко  
препитания своего лишася, научиша царева  
брата, лютаго Астиага, да погубит тя, святыи  
Апостоле. Сей же, неистовый, предав тебе во  
граде Альбане многим мукам, повеле на кресте  
стремглав распяти тя, да престанут уста твоя  
вещати учение Христа распятаго; ты же,  
Апостоле, и на кресте радостно взывал еси  
Господеви: Аллилуиа.

### **Икос 10**

---

Царя и Господа не престал еси проповедати,  
святыи Апостоле, усты своими и вися стремглав  
на кресте: учил бо еси собранныя на позор сей  
люди твердо за веру Христову стояти, согласно

заповедем Евангельским жити и неверныя ко Христу привлекати. Мы же, дивящися укрепляющей тя силе Божией и твоему, святыи Апостоле, мужеству, в похвалу тебе сице глаголем:

Радуйся, славный Христов мучениче.

Радуйся, Христова учения исповедниче дерзновенный.

Радуйся, устами своими даже до смерти истину Божию проповедавый.

Радуйся, терпением своим всю вселенную удививый.

Радуйся, в смертный час твой тысящи людей ко Христу привлекий.

Радуйся, явный благодатныя силы Христовы свидетелю.

Радуйся, позор крестныя смерти, яко победный венец, радостно понесший.

Радуйся, в час смертных мучений своих с Господем в единении пребывый.

Радуйся, в смертном часе райския сладости на земли предвкусивый.

Радуйся, в сей райстей сладости  
Божественнаго естества истинный причастниче.

Радуйся, терпения усердный учителю.

Радуйся, всяких добродетелей вместилище.

Радуйся, святой славный и всехвальный  
Апостоле Варфоломее.

### **Кондак 11**

---

Пение всеумиленное приносим тебе, славный  
Апостоле Христов Варфоломее, смертный твой  
час на древе крестнем воспоминающе, дивимся  
твоему священному за Христа заколению, со  
слезами ублажаем твою кончину, егда мучитель  
лютый повеле и кожу с твоего честнаго тела  
содрати; ты же, святой Апостоле, не престал еси  
Господа восхваляти до того блаженнаго часа,  
егда с кожею твоею глава твоя, велением  
мучителя, усечена бысть, чистая же душа твоя,  
святой Апостоле, восхищена бысть на небеса  
воздавати славу Господеви и со светлыми  
небожители во веки взывати Ему: Аллилуиа.

### **Икос 11**

---

Свет велий во исцеление немощей  
человеческих возсия от честных мощей твоих,  
славный Апостоле, во граде Альбане, егда

вернии, вземше по кончине твоей со креста честное тело твое, во оловянной раце благоговейно, вкупе с главою и кожею, положиша. Егда же невернии бесов служителие узреша, яко мнози в той стране от неверных ко Христовой Церкви прилагахуся, ввергоша в море честныя мощи твоя: тии же во оловянной раце, аки в легкой ладии, по водам понесошася, дондеже пристаху ко острову Липару, идеже епископ Агафон, по Божию откровению, с народом и клиром с радостию сия прият и во храме благоговейно постави, воспевая тебе сице:

Радуйся, славный Апостоле Христов.

Радуйся, верный самовидче Бога Слова и слуго Его.

Радуйся, мудрый Евангелия Христова проповедниче.

Радуйся, чудес неистощимый источниче.

Радуйся, яко мощи твоя от востока и до запада имя Господне восхвалиша.

Радуйся, яко шествием мощей твоих море освятися.

Радуйся, Сирии и Азии просветителю.

Радуйся, Иераполя фригийскаго Апостоле.

Радуйся, яко с проповедию Христовою даже до Индии дошел еси.

Радуйся, яко насельников берегов моря Хвальинскаго светом Христова учения просветил еси.

Радуйся, яко Великую Армению ко Христу привел еси.

Радуйся, яко и нас пришествием мощей твоих сладостно утешил еси.

Радуйся, святыи славныи и всехвальныи Апостоле Варфоломее.

## **Кондак 12**

---

Благодать от Господа достойно подражати житию твоему и прославляти болезни и труды твоя, подаждь нам, святыи Апостоле, якоже иногда Иосифу Песнописцу, егда в навечерие праздника твоего явился еси ему во олтари и святым Евангелием благословил еси его, да и мы молитвами твоими, благодатию Божиею озареннии, купно со всею вселенною Господеви со умилением взываем: Аллилуиа.

---

## Икос 12

Поюще твое за Христом последование,  
восхваляем дивная апостольския труды твоя,  
благоговейно чтим двукратное твое за Христа  
распятие, ублажаем честныя твоя главы  
отсечение, славим неисчетная чудеса от честных  
мощей твоих и в похвалу велегласно тебе  
глаголем:

Радуйся, проповедию твоею многи концы  
вселенныя огласивый.

Радуйся, многия люди ко Христу приведый.

Радуйся, мудрый Евангелия Христова  
проповедниче.

Радуйся, Христовых заповедей твердый  
исполнителю.

Радуйся, яко жителие острова Липара и града  
Беневента, идеже мощи твоя почивают, яко  
своего Апостола тя почитают.

Радуйся, яко подвигам твоим вся вселенная  
дивится.

Радуйся, во Христе отец наш  
многопопечительный.

Радуйся, Апостоле, о нашем спасении zelo рачительный.

Радуйся, яко в день Страшнаго Суда Христова возсядиши на едином от обоюнадесяте престолов, да судиши со Христом всю вселенную.

Радуйся, яко за праведников ходатаем пред единым Судиею и Господем в той час явишися.

Радуйся, славных дел Божиих возвестителю.

Радуйся, злых козней сатанинских сокрушителю.

Радуйся, святой славный и всехвальный Апостоле Варфоломее.

### **Кондак 13**

---

О святой славный и всехвальный Апостоле Варфоломее! Приими сие от нас, недостойных, приносимое тебе хвалебное пение, и якоже ты сам всем сердцем, душою и телом предал еси себе на служение Господеви своему и Учителю, тако и нас, молитвами твоими, сподоби жизнь свою во славу Господню устроить, вся от Него посылаемая со благодарением приимати, и тако тебе подражающе, вечное Царствие наследовати и Господеви, Творцу нашему и Промыслителю, с

тобою и всеми святыми во веки воспевати:  
Аллилуиа.

*(Этот кондак читается трижды, затем икос  
1 и кондак 1).*

### **Молитва**

---

О преславный Апостоле Христов Варфоломее, душу за Христа предавший и кровию твоею пажить Его удобривший! Услыши чад твоих молитвы и воздыхания, сердцем сокрушенным ныне приносимья. Се бо беззаконьми омрачихомся, и того ради бедами, якоже тучами, обложихомся, елея же добраго жития обнищаном зело, и не возможем противитися волком хищным, иже расхищати наследие Божие дерзостно тщатся. О, сильный! Понеси немощи наша, не отлучайся духом от нас, да не разлучимся в конец от любве Божия, но крепким заступлением твоим нас защити, да помилует Господь всех нас молитв твоих ради, да истребит же рукописание безмерных грехов наших, и да сподобит со всеми Святыми блаженнаго Царствия и брака Агнца Своего, Емуже честь и слава, и благодарение и поклонение во веки веков. Аминь.